

Na osnovu člana 24. Zakona o zaštiti od požara i vatrogastvu (Sl. Novine Federacije BiH" br.64/09), člana 94. Zakona o osnovnom odgoju i obrazovanju („Službene novine Kantona Sarajevo“, br. 23/17, 33/17 i 30/19), a u skladu sa Pravilima JU OŠ „Skender Kulenović“, Školski odbor JU OŠ „Skender Kulenović“ Sarajevo na sjednici održanoj dana 06.11.2019. godine, donosi:

PRAVILNIK O ZAŠTITI OD POŽARA

I – OPŠTE ODREDBE

Član 1.

Zaštita od požara obuhvata skup mjera i radnji upravne, organizacijske, stručne, tehničke, obrazovne i propagandne prirode, koje se poduzimaju radi sprječavanja izbijanja i širenja požara, njegova otkrivanja, lokalizacije i gašenja požara, te zaštite i spašavanja ljudi, biljnog i životinjskog svijeta, materijalnih, kulturnih, povijesnih i drugih dobara i okoliša (u daljnjem tekstu: materijalna dobra) ugroženih požarom.

Član 2.

Radi sprječavanja izbijanja požara, otklanjanja opasnosti od požara, spašavanja radnika i imovine ugroženih požarom, ovim Pravilnikom, u skladu sa zakonskim i tehničkim propisima, uređuje se način ostvarivanja prava i obaveza i utvrđuju druga pitanja na organizovanju, sprovođenju i unaprijeđenju zaštite od požara u JU OŠ „Skender Kulenović“.

Član 3.

(1)Ovim Pravilnikom se naročito utvrđuje:

- a) mjere zaštite od požara koje se moraju sprovesti u JU OŠ „Skender Kulenović“. uz bližu razradu obaveza svakog pojedinog radnika u pogledu kontrole i sprovođenja propisa iz oblasti zaštite od požara i radnih uputstava,
- b) organizacija zaštite od požara, djelokrug rada i ovlaštenje lica zaduženih za zaštitu od požara,
- c) način vršenja unutrašnje kontrole sprovođenja zaštite od požara, te dužnosti, odgovornosti i ovlaštenja radnika koji tu kontrolu neposredno vrše,
- d) postupak i način upoznavanja radnika prilikom stupanja na rad ili raspoređivanja na drugo mjesto, kao i način obučavanja radnika u rukovanju sredstvima i opremom za gašenje požara,
- e) vrste i količina opreme i sredstava za gašenje požara, raspored opreme i sredstava kao i vrijeme povremenog ispitivanja njihove ispravnosti,
- f) zadaci i odgovornosti rukovodećih radnika u vezi sa sprovođenjem zaštite od požara,
- g) dužnosti i ponašanja radnika u slučaju izbijanja požara,
- h) način saradnje radnika zaduženih za zaštitu od požara sa ostalim službama JU OŠ „Skender Kulenović“, civilnom zaštitom, inspektorima i ovlaštenim stručnim organizacijama iz oblasti zaštite od požara.

Član 4.

U JU OŠ „Skender Kulenović“ se sprovodi zaštita od požara na svim lokacijama, te kontinuirano radi na poboljšanju uslova iz ove oblasti.

Član 5.

Mjere zaštite od požara propisane ovim Pravilnikom i Planom zaštite od požara, zakonskim i tehničkim propisima i mjere koje su naložene od strane nadležnih organa dužni su da sprovode svi radnici JU OŠ „Skender Kulenović“ i druga lica koja se po bilo kom osnovu nalaze ili zadržavaju u objektima JU OŠ „Skender Kulenović“.

Član 6.

JU OŠ „Skender Kulenović“ je dužna obezbijediti da uporedo sa planovima razvoja JU OŠ „Skender Kulenović“ planira i unapređuje zaštitu od požara, te da najmanje jednom godišnje razmatra stanje zaštite od požara.

Član 7.

- (1) Za organizovanje i unaprjeđenje zaštite od požara u JU OŠ „Skender Kulenović“, za njegovo uspješno funkcionisanje i za kontrolu utvrđenih, propisanih i naloženih mjera zaštite od požara, odgovorni su svako u svom djelokrugu rada:
- a) direktor,
 - b) sekretar,
 - c) pomoćnik direktora,
 - d) radnici JU OŠ „Skender Kulenović“,
 - e) lica zadužena za zaštitu od požara.

II - MJERE ZAŠTITE OD POŽARA KOJE SE MORAJU SPOROVODITI U JU OŠ „SKENDER KULENOVIĆ“ I RADNA UPUTSTVA SA OBAVEZAMA SVIH RADNIKA U POGLEDU KONTROLE I SPOROVODENJE PROPISA IZ OBLASTI ZAŠTITE OD POŽARA

Član 8.

Pored Pravilnika o zaštiti od požara, a u skladu sa zakonskim i drugim propisima, JU OŠ „Skender Kulenović“ izrađuje i donosi i Program mjera i aktivnosti zaštite od požara.

Član 9.

JU OŠ „Skender Kulenović“ je dužna organizovati stalno vođenje, sređivanje i čuvanje odgovarajuće dokumentacije iz oblasti zaštite od požara (Planovi, Pravilnici, Elaborati, Programi, Uputstva, Izvještaji, Informacije, Zapisnici, Odluke, Rješenja, razne evidencije, itd.)

Član 10.

- (1) U cilju sprečavanja nastanka požara i njegovog širenja, kao i u cilju efikasnijeg gašenja nastalog požara, svi radnici JU OŠ „Skender Kulenović“ su dužni provoditi, svako u svom djelokrugu rada, slijedeće opšte mjere:
- a) svaki radnik je dužan svoje poslove i radne zadatke obavljati prema tehničkim i drugim uputstvima, izbjegavajući svaku improvizaciju i neprovjerene postupke koji mogu dovesti do požara i druge nezgode,
 - b) obavezno je svakodnevno čišćenje radnog prostora, uklanjanje raznih otpadaka i smeća izvan JU OŠ „Skender Kulenović“,
 - c) o svim uočenim kvarovima na opremi, uređajima i instalacijama treba odmah obavijestiti neposrednog rukovodioca, odnosno direktora,
 - d) zabranjeno je nestručnim licima vršiti bilo kakve intervencije i popravke mašina, uređaja i instalacija,
 - e) niko od radnika ne smije blokirati rad sigurnosnih uređaja i alarmnih uređaja,
 - f) zabranjeno je zatvarati otvore za prirodno provjetravanje i prekidati rad ventilacionih uređaja,
 - g) u pojasu od 6m oko objekta ne smiju se držati bilo kakve zapaljive i vatroopasne materije,
 - h) u radnim prostorijama je zabranjeno držati i gomilati zalihe materijala preko jednodnevno potrebnih količina,
 - i) svi ključevi od objekata i prostorija, glavnih razvoda el. energije moraju biti označeni sa natpisom (metalnom pločicom), a iste obavezno držati u odgovarajućem i zvanično određenom mjestu,
 - j) u svim objektima i prostorijama je zabranjena upotreba otvorenih električnih grijalica, rešoa, kuhala i dr.,
 - k) udaljenost uskladištenog materijala od tavanice, izlaza, hidranata, elektrorazvoda i vatrogasnih aparata ne smije biti manja od 8 m, a od zidova 0,5 m,
 - l) kontejneri za smeće moraju biti udaljeni od objekata najmanje 8m, a isti se moraju radovno prazniti,
 - m) za vrijeme rada, sva izlazna vrata u stubištima i drugim objektima ne smiju biti zaključana,
 - n) zabranjeno je u krugu JU OŠ „Skender Kulenović“ vršiti spaljivanje otpadaka i loženje otvorene vatre,
 - o) zelene površine u dvorištu moraju se redovno održavati, tj. kositi trava tako da visina trave i rastinja nije veća od 20 cm. Pokošenu travu treba odmah odstranjivati i odlagati na određeno mjesto.

Član 11.

Svi objekti JU OŠ „Skender Kulenović“ mogu se zagrijavati samo putem sistema centralnog grijanja ili pomoću odgovarajućih termoakumulacionih električnih radijatora. Svaki radnik u svojoj radnoj prostoriji, poslije završenog rada i prije napuštanja objekta i prostorije, dužan je isključiti sve električne aparate.

Član 12.

Kod rekonstrukcije, adaptacije i dogradnje postojećih objekata obavezno je prethodno izraditi odgovarajuću tehničku dokumentaciju, koja mora sadržavati i mjere zaštite od požara, a što se utvrđuje pregledom tehničke dokumentacije od strane ovlaštene stručne organizacije za poslove zaštite od požara.

Član 13.

Zabranjeno je mijenjati projektovanu namjenu objekata i prostorija bez odobrenja nadležnog organa i poduzimanja mjera zaštite od požara.

Član 14.

Požarni putevi moraju neprekidno biti slobodni i prohodni cijelom svojom širinom. Svi prilazni putevi do objekata, kao i unutrašnje komunikacije u objektima (hodnici, stepeništa, vrata itd.) moraju uvijek biti slobodni i prohodni cijelom svojom širinom.

Član 15.

U svim objektima JU OŠ „Skender Kulenović“ moraju se obezbijediti odgovarajući prilazi do izlaznih vrata, vatrogasnih aparata i glavnih razvodnih baterija električne energije.

Član 16.

Zabranjeno je parkiranje vozila JU OŠ „Skender Kulenović“ na mjestima koja nisu predviđena za to, a za te svrhe treba koristiti odgovarajuće uređeno parkiralište koje ne smeta prilazu objekta.

Član 17.

- (2) U objektima i radnim prostorijama JU OŠ „Skender Kulenović“ dozvoljena je upotreba samo onih električnih uređaja i instalacija koje po svojim tehničkim karakteristikama odgovaraju tehničkim propisima.
- (3) Električni uređaji i instalacije moraju biti tako izvedeni i zaštićeni da uslijed djelovanja pogonskih uslova (vlaga, prašina, zapaljive pare i gasovi, mehanička oštećenja, toplotni i hemijski uticaji, itd.), ne bude ugrožena sigurnost ljudi, objekata i predmeta rada.

Član 18.

- (1) Obavezno je redovno i u propisanim rokovima (prema tehničkim propisima) vršiti kontrolu ispravnosti i odgovarajuća mjerenja električnih uređaja i instalacija, te preduzimati mjere na otklanjanju uočenih nedostataka.
- (2) O kontroli, mjerenjima i izvršenim opravkama iz prethodnog stava mora se voditi odgovarajuća evidencija.
- (3) Popravke i druge radove na električnim instalacijama mogu vršiti samo stručna lica.

Član 19.

- (1) Zgrade JU OŠ „Skender Kulenović“. moraju biti obezbjeđene sa odgovarajućim klasičnim gromobranskim instalacijama u skladu sa odredbama tehničkih propisa sa gromobranima.
- (2) Obavezna je periodična kontrola ispravnosti gromobranskih instalacija i uzemljenja te otklanjanje uočenih nedostataka, u skladu sa tehničkim propisima.
- (3) Za gromobranske instalacije mora se voditi i čuvati odgovarajuća tehnička dokumentacija i evidencija.

Član 20.

- (1) Svaki radnik JU OŠ „Skender Kulenović“ ima slijedeće obaveze, prava i odgovornosti iz oblasti zaštite od požara:
 - a) dužan je da svoje poslove i radne zadatke obavlja stručno i savjesno kako bi se izbjegla svaka opasnost za nastanak i širenje požara i svaka havarija i nezgoda,
 - b) obavezan je da se pridržava svih uputstava, pravila, propisa i mjera zaštite od požara
 - c) dužan je i ima pravo da prije raspoređivanja na poslove i radne zadatke bude upoznat sa svim požarnim opasnostima, mjerama zaštite od požara, praktičnoj upotrebi opreme i sredstava za gašenje požara, materijalnom i drugom odgovornošću zbog nepridržavanja propisanih mjera zaštite od požara,
 - d) dužan je da usavršava svoja znanja iz oblasti zaštite od požara, te ima pravo da predlaže mjere za poboljšanje i unaprijeđenje sistema zaštite od požara kroz sistem obavezne obuke,
 - e) obavezan je da upozorava svoje radne kolege na propuste iz domena zaštite od požara, te da o tim propustima izvještava neposrednog rukovodioca, odnosno direktora,
 - f) dužan je da neposrednom rukovodiocu, odnosno direktoru odmah prijavi svaki uočeni kvar ili sumnjivu pojavu u procesu rada koja može imati za posljedicu pojavu požara i njegovo širenje,
 - g) obavezan je da vizuelno svakodnevno kontroliše ispravnost opreme, aparata i sredstava za gašenje požara, te da svaki uočeni kvar ili nedostatak odmah prijavi neposrednom rukovodiocu, odnosno direktoru,
 - h) dužan je odmah pristupiti gašenju uočenog požara sa svim raspoloživim sredstvima,
 - i) dužan je prije početka rada da provjeri ispravnost sredstava rada, te da po završetku rada, a prije napuštanja radne prostorije poduzme sve propisane mjere da se spriječi nekontrolisano izbijanje požara,
 - j) dužan je raditi duže od radnog vremena u slučajevima kada je neophodno spriječiti izbijanje požara i drugih havarija,
 - k) ima pravo da odbije raditi određene poslove ako ocijeni da prijeti neposredna opasnost za njegovo zdravlje i život od požara i eksplozije,
 - l) ima pravo zahtijevati da se u sklopu odvijanja procesa rada na vidno mjesto istaknu odgovarajuća uputstva za siguran rad i upozorenja na opasnost od požara i eksplozije,
 - m) ima pravo tražiti dopunsku obuku za rukovanje aparatima, opremom i sredstvima za gašenje požara.

III- ORGANIZACIJA ZAŠTITE OD POŽARA, DJELOKRUG RADA I OVLAŠTENJE LICA ZADUŽENIH ZA ZAŠTITU OD POŽARA

Član 21.

- (1) Direktor JU OŠ „Skender Kulenović“ u djelokrugu zaštite od požara obavlja slijedeće poslove:
- a) donosi odluke i zaključke po pitanjima iz oblasti zaštite od požara,
 - b) odobrava i organizuje službe zaštite od požara,
 - c) imenuje odgovorna lica za zaštitu od požara ispred JU OŠ „Skender Kulenović“,
 - d) odobrava utrošak novčanih sredstava za potrebe zaštite od požara u skladu sa usvojenim planom i programom finansiranja ove oblasti,
 - e) utvrđuje potrebe zaštite od požara u JU OŠ „Skender Kulenović“,
 - f) razmatra izvještaje i stanje zaštite od požara,
 - g) otklanja opasnosti od izbijanja mogućih požara i preuzima sve mjere zaštite,
 - h) donosi opšte akte iz djelokruga zaštite od požara u JU OŠ „Skender Kulenović“

Član 22.

- (1) Sekretar JU OŠ „Skender Kulenović“ u djelokrugu zaštite od požara obavlja slijedeće poslove:
- a) poznavanje organizacije rada JU OŠ „Skender Kulenović“, procesa rada i svih mogućih opasnosti od požara i eksplozije, te mjere za otklanjanje tih opasnosti,
 - b) poznavanje, praćenje i primjena u praksi zakonskih i tehničkih propisa iz oblasti zaštite od požara JU OŠ „Skender Kulenović“,
 - c) poznavanje i primjena opštih i drugih akata JU OŠ „Skender Kulenović“,
 - d) da izučava i analizira požarne opasnosti u svim objektima JU OŠ „Skender Kulenović“, te predlaže i neposredno poduzima mjere za njihovo otklanjanje,
 - e) po potrebi vrši preglede svih odjeljenja, prostorija, prostora, depoa, uređaja i instalacija sa ciljem uočavanja izvora požarnih opasnosti kontrole sprovođenja mjera zaštite od požara, te vodi evidenciju o tome,
 - f) organizuje i sprovodi obučavanje i upoznavanje radnika sa opasnostima i mjerama zaštite od požara i praktičnoj upotrebi aparata, uređaja i sredstava za gašenje požara,
 - g) posebno se stara o posebnom obrazovanju radnika koji rukuju sa zapaljivim tečnostima i tehničkim plinovima,
 - h) izrađuje i učestvuje u izradi i realizaciji Pravilnika i Plana zaštite od požara, Programa obučavanja radnika, raznih elaborata, uputstava i drugih materijala iz oblasti zaštite od požara,
 - i) učestvuje u izradi raznih materijala za direktora i organe upravljanja (odluke, zaključci, naredbe, informacije, itd.), te vodi, sređuje i čuva odgovarajuću dokumentaciju iz oblasti zaštite od požara.

Član 23.

- (1) Pomoćnik direktora JU OŠ „Skender Kulenović“ u djelokrugu zaštite od požara obavljaju slijedeće poslove:
- a) poznavanje organizacije rada JU OŠ „Skender Kulenović“, procesa rada i svih mogućih opasnosti od požara i eksplozije, te mjere za otklanjanje tih opasnosti,
 - b) edukacija radnika JU OŠ „Skender Kulenović“ o mjerama zaštite od požara,
 - c) po potrebi vrši pregled odjeljenja, prostorija, depoa, uređaja i instalacija sa ciljem uočavanja izvora požarnih opasnosti kontrole sprovođenja mjera zaštite od požara,
 - d) predlaže direktoru, sekretaru i radnicima obustavu rada ako prijete neposredna opasnost za izbijanje požara i ugrožavanje života i zdravlja ljudi,
 - e) sarađuje sa direktorom i sekretarom u organizaciji iz oblasti zaštite od požara u cilju unapređenja zaštite od požara.

Član 24.

- (1) Za obavljanje poslova zaštite od požara u JU OŠ „Skender Kulenović“ se određuje odgovorno lice za protivpožarnu zaštitu.
- (2) Djelokrug rada, prava, dužnosti i odgovornosti odgovornog lica za protivpožarnu zaštitu su:
- a) poznavanje organizacije rada JU OŠ „Skender Kulenović“, procesa rada i svih mogućih opasnosti od požara i eksplozije, te mjera za otklanjanje tih opasnosti,
 - b) poznavanje, praćenje i primjena u praksi zakonskih i tehničkih propisa iz oblasti zaštite od požara za upravnu zgradu i sva odjeljenja JU OŠ „Skender Kulenović“ - poznavanje i primjena opštih i drugih akata JU OŠ „Skender Kulenović“,
 - c) da izučava i analizira požarne opasnosti u svim objektima JU OŠ „Skender Kulenović“, te predlaže i neposredno poduzima mjere za njihovo otklanjanje,
 - d) po potrebi vrši preglede svih prostorija, prostora, depoa, uređaja i instalacija sa ciljem uočavanja izvora požarnih opasnosti kontrole sprovođenja mjera zaštite od požara, te vodi evidenciju o tome,
 - e) najmanje jednom godišnje, a po potrebi i češće, podnosi izvještaj o stanju protivpožarne zaštite direktoru JU OŠ „Skender Kulenović“,
 - f) brine se o bezbjednosti potrebnih sredstava i opreme za gašenje požara, kontroliše ispravnost svih vrsta opreme, instalacija, aparata i sredstava za gašenje požara, te poduzima mjere za održavanje stalne ispravnosti i funkcionalnosti istih,
 - g) učestvuje u izradi bližih uputstava za siguran rad po osnovu zaštite od požara u pojedinim prostorijama,
 - h) sugeriše direktoru, sekretaru i radnicima obustavu rada u pojedinim prostorijama ako prijete neposredna opasnost za izbijanje požara i ugrožavanje života i zdravlja radnika,
 - i) sarađuje sa stručnim organizacijama iz oblasti zaštite od požara u cilju unaprijeđenja zaštite od požara,
 - j) radi i druge poslove koji su po prirodi u njegovoj nadležnosti, a u vezi sa zaštitom od požara.

IV - NAČIN VRŠENJA UNUTRAŠNJE KONTROLE SPROVOĐENJA ZAŠTITE OD POŽARA, TE DUŽNOSTI, ODGOVORNOSTI I OVLAŠTENJA RADNIKA KOJI TU KONTROLU NEPOSREDNO VRŠE

Član 25.

- (1) Unutrašnju kontrolu sprovođenja mjera zaštite od požara općenito vrše svi odgovorni organi i radnici iz člana 7. ovog Pravilnika, svako u svom djelokrugu rada, kako je to regulisano ovim Pravilnikom.
- (2) Način vršenja unutrašnje kontrole je dat kroz djelokrug rada, prava, dužnosti, obaveze i odgovornosti radnika.

Član 26.

Prilikom vršenja unutrašnje kontrole sprovođenja mjera zaštite od požara obavezno se, na licu mjesta, o nađenom stanju sastavlja službena pismena zabilješka ili odgovarajući zapisnik.

V - POSTUPAK I NAČIN UPOZNAVANJA RADNIKA SA OPASNOSTIMA OD POŽARA, TE OBUČAVANJE U RUKOVANJU SREDSTVIMA I OPREMOM ZA GAŠENJE POŽARA

Član 27.

JU OŠ „Skender Kulenović“ je dužna obezbjediti da svaki radnik bude upoznat sa opasnostima od požara vezano za poslove i radne zadatke na koje je raspoređen, kao i opremom i sredstvima za gašenje požara, praktičnom upotrebom aparata za početno gašenje požara i drugih sredstava za gašenje požara, kao i sa materijalnom i drugom odgovornošću usljed ne pridržavanja propisanih mjera zaštite od požara.

Član 28.

- (1) Upoznavanje sa opasnostima od požara iz prethodnog člana obavezno se vrši:
 - a) pri zasnivanju radnog odnosa, a prije raspoređivanja radnika na poslove i radne zadatke,
 - b) kod izmjena uslova rada i uvođenja novih poslova na kojima je pojačana opasnost od izbijanja požara,
 - c) kod prijema na praksu i pri stručnoj obuci pripravnika kada postoji potreba za tim.

Član 29.

- (1) Organizovanje zaštite od požara u JU OŠ „Skender Kulenović“ treba vršiti:
 - a) obukom radnika po posebnom programu obuke radnika u pravnim licima, državnim organima i drugim institucijama u oblasti zaštite od požara,
 - b) izradom odgovarajuće dokumentacije iz oblasti zaštite od požara za odjeljenja koja su zakonski obavezna istu imati,
 - c) isticanjem na vidnom mjestu odgovarajućih uputstava, natpisa, plakata i upozorenja.

Član 30.

- (1) JU OŠ „Skender Kulenović“ je dužana da organizuje obuku i provjeru znanja radnika iz oblasti zaštite od požara jednom u dvije godine.
- (2) Svi radnici su dužni pristupiti obuci i provjeri znanja, u suprotnom čine povredu radnih obaveza i dužnosti.
- (3) O obuci i provjeri znanja radnika obavezno se vodi odgovarajuća evidencija od strane lica zaduženih za zaštitu od požara.

VI - PROSTORIJE, PROSTORI I MJESTA NA KOJIMA SE NE SMIJE PROIZVODITI, KORISTITI ILI PRENOSITI OTVORENA VATRA

Član 31.

- (1) U JU OŠ „Skender Kulenović“ nije dozvoljeno proizvoditi, koristiti i prenositi otvorenu vatru i užarene predmete, kao ni pušiti u sljedećim prostorijama i mjestima:
 - a) u svim objektima JU OŠ „Skender Kulenović“ i ostalim prostorima koje koristi JU OŠ „Skender Kulenović“,
 - b) za radnike JU OŠ „Skender Kulenović“ u centralnoj zgradi pušenje je dozvoljeno (u predviđenoj prostoriji ljekarna),
 - c) pri rukovanju, radu i manipulisanju sa zapaljivim tečnostima i tehničkim gasovima,
 - d) u tavanskim prostorijama.
- (2) O ovom trebaju biti vidno istaknuti lako uočljivi natpisi, zabrane i upozorenja na opasnosti od požara i eksplozije.
- (3) Pušenje je dozvoljeno samo na propisano uređenim i obilježenim mjestima i prostorijama za tu namjenu.

VII - VRSTA I KOLIČINA OPREME I SREDSTAVA ZA GAŠENJE POŽARA, RASPORED OPREME I SREDSTAVA KAO I VRIJEME POVREMENOG ISPITIVANJA NJIHOVE ISPRAVNOSTI

Član 32.

Sva odjeljenja, čitaonice, prostorije i kancelarije JU OŠ „Skender Kulenović“ moraju biti obezbjeđeni dovoljnim brojem aparata za gašenje požara i drugom opremom koja se odnosi na oblast protivpožarne zaštite.

Član 33.

- (1) Sva predviđena i instalirana oprema, kao i sredstva za gašenje požara moraju se uvijek nalaziti u ispravnom i funkcionalnom stanju, smještena i raspoređena na vidna mjesta propisno označena i obezbjeđena od oštećenja, nenamjenske upotrebe i smrzavanja u zimskom periodu.
- (2) Kontrolu opreme i sredstava vrši lice zaduženo za zaštitu od požara.

Član 34.

- (1) Kontrola ispravnosti i funkcionalnosti opreme i sredstava za gašenje požara vrši se jednom u 6 mjeseci, a prema uputstvima proizvođača, važećim standardima i tehničkim propisima koji su označeni na opremi.
- (2) O kontroli iz prethodnog stava obavezno se vodi odgovarajuća evidencija od strane lica zaduženih za zaštitu od požara.

Član 35.

- (1) Kontroli ispravnosti i funkcionalnosti podliježe sljedeća oprema koja je u funkciji zaštite od požara:
 - a) aparati za početno gašenje požara,
 - b) vanjska i unutrašnja hidrantska mreža, sa svojim hidrantima i opremom, ukoliko takva postoji,
 - c) sistemi za otkrivanje i dojavu požara.
- (2) Kontrola iz prethodnog stava obavezno se povjerava stručnim organizacijama koje su ovlaštene i osposobljene za vršenje ovih poslova.

Član 36.

- (1) Oko svih uređaja i opreme za gašenje požara moraju se uvijek osigurati prilazni putevi i slobodan prostor, a u zimskom periodu hidranti moraju biti obezbijeđeni od smrzavanja vode u njima.
- (2) Zabranjeno je opremu i sredstva za gašenje požara koristiti u nenamjenske svrhe, u suprotnom čini se povreda radnih obaveza i dužnosti.

VIII - ZADACI I ODGOVORNOSTI RUKOVODNIH RADNIKA U VEZI SA SPROVOĐENJEM ZAŠTITE OD POŽARA

Član 37.

- (1) Direktor, sekretar, pomoćnik direktora, odgovorno lice od požara i ostali radnici, svako u svom okrugu rada, imaju sljedeće zadatke, obaveze, prava i odgovornosti iz oblasti zaštite od požara:
 - a) kroz organizovanje i rukovođenje procesom rada u svojoj nadležnosti (službi) obezbjeđuju primjenu propisanih mjera zaštite od požara u cilju sigurnosti radnika i imovine od požara, eksplozije i drugih havarija,
 - b) dužni su poduzeti sve neophodne mjere za otklanjanje neposrednih opasnosti od požara i eksplozije, bilo da su ih sami uočili bilo da su na njih upozoreni od drugih radnika,
 - c) organizuju gašenje požara u svojoj organizacionoj jedinici do dolaska vatrogasne jedinice na mjesto požara,
 - d) predlažu obustavljanje rada u prostorijama gdje prijeti neposredna opasnost od požara i eksplozije, a sami su dužni poduzeti sve mjere da do te opasnosti ne dođe.

IX - ODGOVORNOSTI RADNIKA U JU OŠ „SKENDER KULENOVIĆ“ ZBOG NEPRIDRŽAVANJA PROPISANIH MJERA ZAŠTITE OD POŽARA

Član 38.

Svaki radnik JU OŠ „Skender Kulenović“ koji ne poštuje odredbe ovog Pravilnika i njegovih pratećih uputstava, odredbe zakonskih i tehničkih propisa iz oblasti zaštite od požara, te ne sprovodi propisane mjere zaštite od požara, čini težu povredu radnih obaveza i dužnosti, za koju se može izreći odgovarajuća disciplinska mjera, shodno odgovarajućem opštem aktu.

Član 39.

Ako radnik u vršenju poslova i radnih zadataka, prouzrokuje materijalnu štetu svojom krivicom, a u vezi sa nepridržavanjem propisanih mjera zaštite od požara, dužan je istu nadoknaditi, kako je to regulisano u odgovarajućem opštem aktu.

Član 40.

(1) Kao teža povreda radne obaveze iz oblasti zaštite od požara smatra se, naročito:

- a) izazivanje požara, namjerno ili iz nehata,
- b) upotreba otvorene vatre ili pušenje na zabranjenim mjestima,
- c) zloupotreba ili nenamjenska upotreba opreme za gašenje požara, kao i njihovo namjerno oštećenje,
- d) izbjegavanje ili odbijanje učešća u akcijama gašenja požara i spašavanja lica i imovine ugrožene požarom,
- e) neprijavljivanje požara ili nepoduzimanje mjera za gašenje požara i spašavanja lica i imovine ugrožene požarom,
- f) ometanje akcije gašenja požara i spašavanja radnika i imovine,
- g) ostavljanje neočišćenog radnog mjesta po isteku radnog vremena, što može imati teže posljedice za nastanak i širenje požara,
- h) neovlašteno blokiranje rada sigurnosnih i alarmnih uređaja,
- i) zakrčavanje opreme za gašenje požara, vanjskih i unutrašnjih požarnih i komunikacionih puteva, te prilaza do objekata,
- j) neobavljanje periodičnih pregleda ispravnosti i funkcionalnosti opreme, uređaja i instalacija koji su u funkciji zaštite od požara,
- k) nevršenje propisane kontrole sprovođenja propisanih mjera zaštite od požara,
- l) neobezbjedenje objekata sa aparatima za početno gašenje požara i drugom opremom za gašenje požara,
- m) nepristupanje obuci i provjeri znanja iz oblasti zaštite od požara.

X - DUŽNOSTI I PONAŠANJE RADNIKA U SLUČAJU IZBIJANJA POŽARA

Član 41.

(1) Svaki radnik koji primijeti požar, dužan je odmah bez panike pristupiti njegovom gašenju i lokalizovanju istog, ako to može učiniti bez opasnosti za sebe ili druge radnike. Istovremeno

treba uzvikom "POŽAR"! uzbuniti ostale radnike u objektu ili prostoriji, koji priskaču u pomoć i gase nastali požar.

- (2) Ako prisutni radnici nisu u stanju sami ugasiti požar (potrebna je brza procjena situacije) dužni su izvršiti i dojavu požara neposrednom rukovodiocu, direktoru ili Profesionalnoj vatrogasnoj jedinici, a prema Planu zaštite od požara JU OŠ „Skender Kulenović“.
- (3) Dojava požara vrši se telefonom, odnosno na drugi najbrži mogući način.
- (4) O požaru treba izvjestiti nadležno Ministarstvo Unutrašnjih Poslova i rukovodioca, odnosno direktora.
- (5) Kod dojava požara treba saopštiti: mjesto gdje je izbio požar, šta gori, u kom obimu i da li prijeti neposredna opasnost za život ljudi, imovine i drugih objekata.
- (6) Do dolaska pozvane vatrogasne jedinice na mjesto požara, prisutni radnici na čelu sa neposrednim rukovodiocem, odnosno direktorom dužni su organizovati gašenje nastalog požara, a posebno trebaju učiniti slijedeće:
 - a) organizovati spasavanje eventualno ugroženih radnika, učenika i imovine,
 - b) organizovati evakuaciju iz ugrožene zone: lako zapaljivih eksplozivnih, otrovnih i vatroopasnih materija od vrijednosnih papira, novca, tehničke i druge dokumentacije, te motornih vozila i opreme,
 - c) obezbjediti isključenje struje u dotičnom objektu,
 - d) zatvoriti odgovarajuća vrata i prozore da se spriječi širenje požara,
 - e) obezbjediti na licu mjesta prisustvo odgovarajućih stručnih radnika koji mogu biti od koristi u akciji gašenja požara, - poduzeti i druge mjere zavisno od date situacije.

Član 42.

U slučaju požara radnici JU OŠ „Skender Kulenović“. su dužni pristupiti gašenju nastalog požara i brzo izvršiti dojavu požara na broj **123**.

Član 43.

Svi radnici su dužni na poziv direktora ili lica koje on ovlasti aktivno se uključiti u akciju gašenja požara i spašavanja imovine i lica, i u toj akciji učestvovati sve dok ista traje.

Član 44.

Kada na mjesto požara stigne pozvana vatrogasna jedinica, njen komandir preuzima rukovođenje akcijom gašenja požara.

Član 45.

Ostali elementi akcije gašenja požara i spašavanja imovine i lica regulišu se Planom zaštite od požara JU OŠ „Skender Kulenović“. i Planom zaštite od požara kantona, odnosno opštine.

Član 46.

Sva lica koja učestvuju u akciji gašenja požara i spašavanja ljudi i imovine ugrožene požarom i drugim elementarnim nepogodama, osigurana su po posebnim propisima o zdravstvenom i invalidskom osiguranju.

XI - NAČIN SARADNJE LICA ZADUŽENIH ZA ZAŠTITU OD POŽARA SA DRUGIM SLUŽBAMA JU OŠ „SKENDER KULENOVIĆ“, STRUČNIM ORGANIZACIJAMA I ORGANIMA IZ OBLASTI ZAŠTITE OD POŽARA

Član 47.

- (1) Lice zaduženo za zaštitu od požara dužno je takođe sarađivati sa svim ovlaštenim preduzećima i drugim pravnim licima iz oblasti zaštite od požara, a naročito sa:
 - a) nadležnim inspekcijskim i drugim organima opštine, kantona i federacije - države,
 - b) vatrogasnim jedinicama na teritoriji Kantona, odnosno opštine,
 - c) stručnim organizacijama koje se bave zaštitom od požara.
- (2) Saradnja sa ovlaštenim organizacijama i pravnim licima ostvarivat će se kroz lične kontakte i konsultacije, prisustvovanje stručnim seminarima, savjetovanjima i izložbama, traženje stručnih savjeta i objašnjenja, planiranje izvođenja praktičnih i vatrogasnih vježbi u krugu JU OŠ „Skender Kulenović“, obavljanje stručnih pregleda objekata i tehničke dokumentacije, izradu plana, programa i drugih projekata zaštite od požara itd.

XII - PRELAZNE I ZAVRŠNE ODREDBE

Član 48.

Za sva prava, dužnosti i odgovornosti radnika iz oblasti zaštite od požara koji nisu regulisani ovim Pravilnikom važe odredbe Zakona iz oblasti zaštite od požara i vatrogastva.

Član 49.

- (1) Izmjene i dopune ovog Pravilnika vrše se na način i po postupku kao i za njegovo donošenje.
- (2) Inicijativu za pokretanje postupka za izmjene i dopune ovog Pravilnika mogu pokrenuti:
 - a) direktor JU OŠ „Skender Kulenović“,
 - b) lice zaduženo za zaštitu od požara.

Član 50.

Stupanjem na snagu ovog Pravilnika prestaje da važi Pravilnik o zaštiti od požara i fizičkom obezbjeđenju imovine br. 281/2004 od 29.09.2004. godine.

Član 51.

Ovaj Pravilnik stupa na snagu danom donošenja.

Broj:

Datum: 06.11.2019. godine

Predsjednik Školskog odbora
